

ՏԵՂԵԿԱՆՔ

«Հայաստանի Հանրապետության և Բուլղարիայի Հանրապետության միջև աշխատանքային միգրացիայի կարգավորման մասին» համաձայնագրի վավերացման նպատակահարմարության վերաբերյալ

«Հայաստանի Հանրապետության և Բուլղարիայի Հանրապետության միջև
աշխատանքային միգրացիայի կարգավորման մասին» համաձայնագիրը
ստորագրվել է ս.թ. փետրվարի 12-ին՝ Բուլղարիայի Հանրապետության նախագահ
Ռումեն Ռադեվի և նրա գլխավորած պատվիրակության՝ Հայաստան կատարած
պաշտոնական այցի ընթացքում: Համաձայնագիրը ստորագրել են ՀՀ աշխատանքի
և սոցիալական հարցերի նախարար Արտեմ Ասատրյանը և Բուլղարիայի
Հանրապետության աշխատանքի և սոցիալական քաղաքականության նախարար
Բիսեր Պետկովը:

Համաձայնագիրը կնպաստի երկու պետությունների միջև աշխատանքային
միգրացիայի արդյունավետ կարգավորմանը և աշխատանքային միգրանտների
իրավունքների ու շահերի պաշտպանությանը:

Համաձայնագրով նախատեսված է Հայաստանի Հանրապետության և
Բուլղարիայի Հանրապետության քաղաքացիների աշխատանքային պայմանագիր
կնքած աշխատողների կատեգորիաների շրջանակը, ովքեր իրավունք ունեն առանց
աշխատանքի թույլտվության իրականացնել աշխատանքային գործունեություն՝
ընդունող կողմի տարածքում կացության անհրաժեշտ թույլտվության առկայության
դեպքում: Փաստաթղթով սահմանվում են նաև Համաձայնագրի համար
պատասխանատու Կողմերի Լիազորված մարմինները, Համաձայնագրի
իրականացման համար նշանակված Իրավասու հաստատությունները, ինչպես նաև
Համաձայնագրի շրջանակներում ստեղծված Համատեղ ընտրական հանձնաժողովի
պարտավորությունները, Հայաստանի Հանրապետության և Բուլղարիայի
Հանրապետության քաղաքացիների, ինչպես նաև նրանց ուղեկցող ընտանիքի
անդամների մուտքի, գտնվելու և զբաղվածության կարգավորմանն առնչվող,
աշխատանքի ընդունման միջնորդության, միգրանտ աշխատողների
աշխատանքային պայմանների, սոցիալական իրավունքների և վերադարձի մասին
դրույթներ:

Հաշվի առնելով վերոգրյալը՝ ՀՀ աշխատանքի և սոցիալական հարցերի
նախարարությունը նպատակահարմար է գտնում «Հայաստանի Հանրապետության
և Բուլղարիայի Հանրապետության միջև աշխատանքային միգրացիայի
կարգավորման մասին» համաձայնագրի վավերացումը:

